

Simmun 1: July 4, 2026

CORINTH KHOPI A PAUL NATOH



“Chu in jaan in Pakai
in Paul akimusah in,

“Nangma kicha hih
in, thu sei jing
jieng in, umthim hih
in; Keiman nangma
ka umpi jing nai,
chule suhsiet ding a
koiman nabalhu lou
ding ahi;

ijieh in em iti leh
hiche khopi sung a
hin mi tantah kanei
e” ati”

(Acts 18:9, 10)

Paul lekhathot lah a Rome mite athot chu sao pen ahin, aban tah a Corinth mite athot chu ahi.

Hiche lekhathot teni asut hi hapta phabep bou kikhah ahi. Ani gel a hin Paul in tahsan mite lah a thunoh baotam hung umdoh ho suhthip ding je asun e.

Hiche thuthot hetthiemna din hiche phaata lai dinmun jong hetthiem masah ngai ah ahi.



Paul Kikouna

Corinth Juon a Ache

Corinth Khopi

Corinth Mite

Corinth Mite Lekha Kithot Ho



PAUL KIKOUNA

"Mihiem a kuon le mihiem vang a hilou, Jesu Christa jieh le athi lah a kuon a Jesu kaithou ah Pa Pathien jal a solchah keima Paul."

(Galatia 1:1)

Jesu'n 12 alhendoh ban a solchah lah a kisimtha, Bible a kiminphah adang jong aum e. Matthias (Acts 1:26), Barnabas (Acts 14:4), Jacob leh Paul (1 Corinth 15:7-9) ho jong ahi uve.

Paul iti solchah hung hithei a ham?

Jesu deisah vang a (Gal. 1:1)

Itih a kilheng doh hija ham?

Anu naobu aumlai a pat (Gal. 1:15)

Itih a kouna chang ham?

Damascus lampi ache pet a(Acts 22:6-7)

Koi ding solchah hija ham?

Gentile te dia (Gal. 2:9)



Kouna achan apat Paul hinkho Jesu a kiphut det ahi ngal tai. Jesu bou agel in, aseidoh jouse Jesu jong thu jieng ahin, mite Jesu alhut pih tai.

Hijieh chun Corinth khopi alhun lhun chun Jesu thu bou aseipai tan ahi (1 Cor. 2:2).

CORINTH JUON A ACHE



“Hiche jouvin Paul in Athens dalha'n Corinth ajuon tai.” (Acts 18:1)

Missionary akhuoljin 2 veina chun Lhagao Thieng in Europe gei che din ano tai (Acts 16:6-10). Hinla achena khopi- Philippi (Acts 16:12, 38-39), Thessalonica (Acts 17:1, 5, 9-10), chule Berea (Acts 17:13-14)- hon banneicha'n ahin deldoh uve.

Athens a Judate kikhopna synagogue leh Gentile te kailhang a thupha aseijou chun Areopagus (Acts 17:16-21) a jong sei din akouvun ahi. Thugil tah aseijou chun lhomcha bouvin Jesu akisaan ta uve (Acts 17:34).

Athens adalhad chun Corinth ajuon ngal in, hiva chun hiche khopi a puonbuh akhuikhompi Aquila le Priscilla toh akimuto ta uve (Acts 18:1-3).

Hichun abol ngai bang in Judate hou in leh Gentile ho kititna dung a thupha ahille ji'n ahi (Acts 18:4-8). Athens a “*machalmona*” aum vang in, Corinth alhun jouva pat mihiem chihna suong louva, “*thingpel a kikhonbeh tasa Jesu Christa*” jieng bou seiphuong din akigellha tai (1 Corinth 2:2).



CORINTH KHOPI

“...hiti chun pathien tapi le pakai tamtah hijong leu” (1 Corinth 8:5b).

Rome ten Corinth khopi 146 BC chun ana suchimit uve. Chu in 46 BC chun Julius Caesar in sipai pangsa le milham phabep hiche khopi cheng din anasol e. 44 BC vel chun hiche khopi jong ahung kiduodoh in, Paul khuoljin lai chun kuongkaimun khopi lhingset khat anahi tai.

Corinth khopi hi mun kilem laitah a um ahin, avel ah kuongkaimun lu mama 2 um ahi: Lechaeum leh Cenchreae.

Sumkol veije ahe'n, puonbuh akhui ji e. Corinth khopi haosat dan Athens khopi toh te thei leu ahivang in, phatlouna achin phabep aum e.




Milim hou le chonthanhuoina tincheng in khopi aluo dim in, mite chondan khat in aumdoh tai. Paul in Corinth mite athuthot chu hiti ho a kuon a houbung mite kivendohna ding lampang jieng ahi.



CORINTH MITE

Jan a Paul in thiemgao thilmu a mu aneina a Pakai in "Kichat dan, umthim lou hiel in, sei jom jing in" ati (Acts 18:9)



Corinth khopi Juda hon thupha chu anuol tah jieh un Paul jong, synagogue gei a um in khat a, Gentile ho akikhopkhompi ji tan ahi (Acts 18:4-7).

“Hiche khopi Gentile mite chonthanhuoina leh Juda mi um hon athetbolna u sangpi tah jal chun Paul hatah in alunglha e. Hilai a hin houbung tundoh theina ding le manchah pha ima amu pon ahi.”

(EGW The Acts of the Apostle p. 250).

Hiche phaatah lai tah chun Jesu ajaanmang in, gaovin ahung kilah in, Corinth mite lah a athupha phuon ngalouva, aboljom joh din ahung tiilkhovin, tampi'n thupha ahin kisaan ding jong ateppih tai (Acts 18:9-10).

Hichun thahat ape'n, kum 1 le akeh Corinth khopi achaamden tai (Acts 18:11). Akhonna'n, Juda hon vaihom ho kom a Paul ahehse un (Acts 18:12-13), Corinth khopi ahin dalhah chun houbung lien tah ana umdoh man tan ahi (Acts 18:18).



CORINTH MITE LEKHA KITHOT HO

“Ijeh in em itile ka sopite, nalah uva kinah baotam alen chu Chloe insung miten kajah a kichien tah in ei seipih ta uve.” (1 Corinth 1:11)

1 Corinth 1-6


Chloe a kuon houbung mite lah kinah baotam thu umho ajah chun Paul in hatah in aphohsal tai. Loitum siem, jonpan, kidinte chule noti chonchan tho tampi ana um ta uve.

1 Corinth 7-16

Chloe insung mite chun houbung mite hetthiemplou thudol phachuompi (*nupa kakah, nupa kida, jineilouva umden, milim hieng a kilhan tasa sa, houkhom kimanchah dan, lhagao thilpieh manchah je, thokitna thudol ho*) jong aseipih un, Paul in bulhing set in ana hilchien e.

2 Corinth

Paul in lekhatot dang tampi jong anathot e, ahin hiche hi tuchan um jing anina chu ahi. Corinth miten abuoina u phachuompi asuhlhap u pachatna ape'n, vannuoi mite thilsuut bang hilouva gospel mit a vannuoi thudol amuthei johna diuvin atilkhove.



“Pathien lhacha hon khopi dung a khangitlouna, vaihom dihlou, chonthanhuoina amu tieng u leh lunglhalouva um ding u ahi; huhhingna thupha alhangsap jing lai uva hiche ho kimaituopi dia kikou ahi uve.

Pathien in khangitlouna dim Corinth mite lah a thupha phuong dia akou Paul atiikhouna kamcheng “*Keiman ka umpi jing in, koiman suhsiet dia na nokhum lou ding ahi; ijieh in em itile hiche khopi sung jieng a jong mihiem tampi kanei e*” [Acts 18:9,10] chun alhacha jouse jong atiilkhouva, athahat sah ding ahi... [...]

Khopi jouse kitha-kimat le chonkhielna’n dimset jong leh Pathien thupha phatah a kihil jieh a Jesu hin kisaan ding le anung hin jui ding tampi jong um a ahi. Hiti chun bolleu sang tampi’n Pathien thupha hin kihetdoh un tin, Christa amimal Huhhingpu a ahin kisaan ding u ahi.”

EGW (Prophets and Kings, p. 277)